

D'ci temps lou pieton bousse sai bécane d'in hôta è l'âtre, de pus en pus baboéyou et djoyou, chutôt tiaind qu'èl aippoétche les pensions obin les allocations! È finiât tôte sa touénée dains enne p'tête mâjon, in pô r'tirie di v'laidge: l'hanne traivaiye tote lai djoènée chu les tchainties de l'EDF, lai fanne trove lou temps grant et n'é pé froid ès eûyes. Ma foi, lai bécane di Léon s'râte des boènnès boussées et sanne endremie contre in muret r'tieuvri de tairète... Lai réssue s'aivaince dje tiaind qu'è r'prend son moénat, lai cape in pô d'traivie, et se tchaimpe vidy'rousement dains les rebrâs d'lai douçatte aivâlée que l'moène vés lai vèlle. Bîn chur lou « pieton » n'ât pé tôte en lai nace: djoués de pieudge, djoués de nadge, djoués de fritchaisse, è vait tot d'meinme son tch'min, envirovète dains enne grôsse cape, daivô enne caipuche démeûjorie. Et peus, tiaind qu'èl airrive, les tchîns v'niant dieûlaie dains ses pies c'ment des évadnès, dâs qu'ès l'cognéchant des fins meus. I n'ai djanmais compris poquoi.



Nôs éîns aivéjies è ci Léon, è f'sait paitchie di v'laidge, an lu poidjonait bîn soie ses quéques défâts, qu'nôs f'sint è ryaie dgentiment. Dinnai nôs l'ains t'aivu bîn des onnès, et tiaind qu'èl ât paitchi en r'trète, aitchè s'ât predju que f'sait lou tchairme de tos les djoués.

Mitnaint les pochtes pèssant vit'ment dains yos djânes dyimbardes, ès ne djasant pus è niun, tôte preussies ès ritant d'enne caïse è l'âtre. Ach'bîn ès tchaindeant sains râte, an n'les cognât pé, ès n'aint pus de p'tét nom, ès sont vétis c'ment des rôlous, « badgelaie », « sôrire », ès n'saint piepe c'que çoli veut dire.

I me d'mainde: laivoû que sont ces aivaincies qu'an en é piein lai goûerdge? Crébîn qu'les dgens d'lai pôchte se dépiaçant pus vit'ment, et aiprés? Yot'ôvraidge s'en trove moiyou?

Eh nian, nôs l'sains tus!

Tchéтчun d'moère tot po lu, voili l'réjultat, et dâli: pé d'aittäiche entre les dgens, pé d'sofin, pé d'humanité, nôs tchissans tot drèt vés lai saïvadg'rie. Âch'bîn nôs en ains des exempyes è foûejon.

Et poétchaint, ran n'ât oblidge, ran n'ât predju è djanmais, lou soûe ne moène pé l'monde, c'tés que l'diant sont des mentous. Lou monde s'ré dempie c'que les dgens en fraint.

Nôs sondgeans tus è enne vétchiaince simpye, tchâl'rouse et djoyouse? Eh bîn, aittieuds!, Lai voitâbye aivaincie s'trove de c'te sen!

F. Busser